

Bosna i Hercegovina
FEDERACIJA BOSNE I HERCEGOVINE
V L A D A
Ured za saradnju i zastupanje pred
Ustavnim sudom Bosne i Hercegovine i
Ustavnim sudom Federacije
Bosne i Hercegovine
S A R A J E V O

Bosnia and Herzegovina
FEDERATION OF BOSNIA AND HERZEGOVINA
G O V E R N M E N T
Office for Cooperation and Representation before
the Constitutional court of Bosnia and Herzegovina
and the Constitutional court of the Federation of
Bosnia and Herzegovina
S A R A J E V O

Broj: 01-04-157/25
Sarajevo, 10.11.2025. godine

PARLAMENT FEDERACIJE BOSNE I HERCEGOVINE
PREDSTAVNIČKI/ZASTUPNIČKI DOM
Predsjedavajući gosp. Dragan Mioković

Bosna i Hercegovina
Federacija Bosne i Hercegovine
PARLAMENT FEDERACIJE
S A R A J E V O

Predmet: Odgovor na poslaničko pitanje – dostavlja se

Primijeno: 11-11-2025			
Org. jed.	Broj	Priloga	Vrijednost
05/1	-02-	625	125

Poštovani,

Jasmina Biščević-Tokić poslanik u Predstavničkom domu Parlamenta Federacije BiH je na 25. redovnoj sjednici Predstavničkog doma Parlamenta Federacije BiH, održanoj 28.10.2025.godine, postavila poslaničko pitanje koje glasi:

- Zašto Premijer Federacije Bosne i Hercegovine Nermin Nikšić još uvijek nije izvršio Odluku Ustavnog suda BiH o dopustivosti i meritumu broj U-12/23 od 28.09.2023.godine i zašto Premijer Federacije iskazuje odnos nepoštovanja prema odlukama Ustavnog suda BiH i na takav način podriva vladavinu prava u BiH.

Postupajući po zahtjevu poslanika Jasmine Biščević-Tokić dostavljamo odgovor na postavljeno poslaničko pitanje kako slijedi:

Ustavni sud Bosne i Hercegovine, donio je Odluku o dopustivosti i meritumu broj: U- 12/23 od 28.09.2023.godine, kojom je utvrdio da član 20. Zakona o plaćama i naknadama u organima vlasti Federacije Bosne i Hercegovine ("Službene novine Federacije Bosne i Hercegovine" br. 45/10, 111/12, 20/17, 22/19 i 94/20), u dijelu IV u alineji kojom je propisano "stručni sudski savjetnici u Vrhovnom sudu Federacije", nije u skladu sa članom II/4. Ustava Bosne i Hercegovine, članom 1. Protokola broj 12 uz Evropsku konvenciju za zaštitu ljudskih prava i osnovnih sloboda i članom 26. Međunarodnog pakta o građanskim i političkim pravima.

Predmetnom odlukom sud je naložio Parlamentu Federacije Bosne i Hercegovine da najkasnije u roku od šest mjeseci od dana objavljivanja odluke u "Službenom glasniku Bosne i Hercegovine" izmijeni relevantne zakonske odredbe kojim bi se sudskim stručnim savjetnicima u Vrhovnom sudu Federacije Bosne i Hercegovine propisalo pravo na godišnje korigiranje osnovne mjesečne plaće za procent povećanja prosječne mjesečne neto plaće u Bosni i Hercegovini, u skladu s odredbama člana II/4. Ustava Bosne i Hercegovine, člana

1. Protokola broj 12 uz Evropsku konvenciju za zaštitu ljudskih prava i osnovnih sloboda i člana 26. Međunarodnog pakta o građanskim i političkim pravima.

Odluka je objavljena 27.10.2023.godine u "Službenom glasniku Bosne i Hercegovine", broj 74/23.

Sud je naložio Parlamentu Federacije Bosne i Hercegovine da u roku od šest mjeseci izmijeni relevantne zakonske odredbe i obavijesti Ustavni sud Bosne i Hercegovine o mjerama preduzetim s ciljem izvršenja ove odluke. Rok za izvršenje Odluke je bio 29.04.2024.godine.

Vlada Federacije Bosne i Hercegovine je na 18. sjednici održanoj 30.10.2023. godine donijela Zaključak V.broj:1552/2023 od 30.10.2023. godine, kojim se zadužuju federalna ministarstva i nadležni organi da hitno poduzmu aktivnosti u cilju izvršenja odluka Evropskog suda za ljudska prava Ustavnog suda Bosne i Hercegovine i Ustavnog suda Federacije Bosne i Hercegovine iz kojih proizilaze obaveze izmjene zakonodavstva u određenoj oblasti.

Vlada Federacije Bosne i Hercegovine je na 20. sjednici održanoj 15.11.2023. godine donijela Zaključak V.broj:1667/2023 od 15.11.2023. godine, kojim se tačkom 4. Zaključka zadužuju federalna ministarstva i federalne uprave da u roku od sedam dana Vladi Federacije Bosne i Hercegovine dostave prednacrt/nacrt zakona kojima će se osigurati izvršenje odluka Evropskog suda za ljudska prava Ustavnog suda Bosne i Hercegovine i Ustavnog suda Federacije Bosne i Hercegovine radi utvrđivanja nacrt/prijedloga zakona i upućivanja u parlamentarnu proceduru.

Dom naroda Parlamenta Federacije Bosne i Hercegovine je Zaključkom sa 5. sjednice održane 27.11.2023.godine, zadužio Premijera Federacije Bosne i Hercegovine da sukladno obavezama iz Ustava Federacije Bosne i Hercegovine, osigura izvršenje Odluke Ustavnog suda Bosne i Hercegovine broj: U-12/23 od 28.09.2023.godine.

Vlada Federacije Bosne i Hercegovine je aktom broj 03-02-1411/2023 od 04.12.2023.godine dostavila navedeni Zaključak Doma naroda Parlamenta Federacije i Odluku Ustavnog suda BiH Federalnom ministarstvu pravde i Uredu za saradnju i zastupanje pred Ustavnim sudom Bosne i Hercegovine i Ustavnim sudom Federacije Bosne i Hercegovine, radi postupanja u skladu sa nadležnostima.

S tim u vezi, dopisima Ureda broj: 02-1-05-188/23 od 08.12.2023., 08.02.2024., 08.04.2024. i 11.09.2024.godine, od Federalnog ministarstva pravde zatražene su informacije o aktivnostima poduzetim vezano za izvršenje Odluke Ustavnog suda Bosne i Hercegovine, radi praćenja izvršenja Odluke, u skladu sa nadležnostima Ureda.

Federalno ministarstvo pravde je dopisima od 17.04.2024., 17.05.2024., 18.09.2024. i 23.06.2025.godine dostavilo informacije o poduzetim aktivnostima u cilju izvršenja Odluke.

U cilju implementacije odluka, između ostalih i predmetne Odluke, Vlada Federacije Bosne i Hercegovine je na 36. sjednici, održanoj 20.06.2024.godine, donijela Zaključak V. Broj: 934/2024, kojim je usvojila Informaciju o statusu izvršenja odluka Ustavnog suda Bosne i Hercegovine, Ustavnog suda Federacije Bosne i Hercegovine i Evropskog suda za ljudska prava i zadužila sva resorna ministarstva koja imaju zaduženja po osnovu odluka navedenih sudova da o statusima izvršenja odluka izvijeste Vladu Federacije BiH i Ured za saradnju i zastupanje pred Ustavnim sudom BiH i Ustavnim sudom Federacije BiH u narednih 15 dana, a paralelno da poduzimaju aktivnosti na realizaciji odluka, obrađujući ono što stoji u odlukama.

Nadalje, Premijer Federacije Bosne i Hercegovine Nermin Nikšić, u skladu sa ovlastima iz člana IV.B.3.7.c) (I) Ustava Federacije Bosne i Hercegovine, je aktom od 25.02.2025.godine zatražio od Federalnog ministarstva pravde hitno poduzimanje aktivnosti u cilju izvršenja Odluke Ustavnog suda BiH U-12/23 od 28.09.2023. godine, te dostavljanje obavijesti u roku od 15 dana.

Međutim, Ustavni sud Bosne i Hercegovine je na sjednici održanoj 27. marta 2025.godine donio Rješenje U - 12/23, kojim se utvrđuje da Odluka Ustavnog suda Bosne i Hercegovine broj U-12/23 od 28. septembra 2023.godine, nije izvršena. Rješenje je objavljeno 11. aprila 2025. godine u „Službenom glasniku Bosne i Hercegovine“ broj 21/25, te je dostavljeno nadležnom Tužiteljstvu Bosne i Hercegovine, na daljni postupak.

Rješenje o neprovođenju je dostavljeno Federalnom ministarstvu pravde radi hitnog poduzimanja aktivnosti s ciljem izvršenja Odluke Ustavnog suda Bosne i Hercegovine, odnosno upućivanje Nacrta Zakona o izmjenama i dopunama Zakona o plaćama i drugim naknadama sudaca i tužitelja u Federaciji BiH, na razmatranje.

Na prijedlog Federalnog ministarstva pravde, Vlada Federacije BiH je na 54.sjednici održanoj 12.05.2025.godine utvrdila Prijedlog Zakona o izmjenama Zakona o plaćama i drugim naknadama sudija i tužilaca u Federaciji Bosne i Hercegovine i aktom od 13.05.2025.godine uputila u parlamentarnu proceduru.

Predstavnički dom Parlamenta Federacije BiH na 23. redovnoj sjednici održanoj 23.07.2025.godine nije usvojio Prijedlog Zakona o izmjenama i dopunama Zakona o plaćama i drugim naknadama sudija i tužilaca u Federaciji Bosne i Hercegovine, jer isti prilikom glasanja nije dobio potrebnu većinu glasova, dok je Dom naroda Parlamenta Federacije na 20.sjednici održanoj 28.07.2025.godine odlučio da sa predloženog dnevnog reda skine Prijedlog navedenog zakona, jer ga nije usvojio Predstavnički dom Parlamenta Federacije Bosne i Hercegovine.

Iz svega navedenog proizilazi da je Vlada Federacije Bosne i Hercegovine poduzela sve aktivnosti s ciljem izvršenja odluke Ustavnog suda Bosne i Hercegovine, kao i da Premijer Federacije Bosne i Hercegovine, postupajući u skladu s obavezama iz Ustava Federacije Bosne i Hercegovine, iskazuje poštovanje prema odlukama Ustavnog suda BiH, a da Parlament Federacije BiH kojem je Ustavni sud BiH dostavio predmetnu odluku na izvršenje i naložio izmjenu relevantnih zakonskih odredbi, neusvajanjem zakona istu nije izvršio.

S poštovanjem,



DIREKTOR

Melina Mujezinović - Katana